



**KEMENTERIAN WILAYAH PERSEKUTUAN**  
Blok 2, Menara Seri Wilayah, Presint 2, 62100 Putrajaya  
Tel: 03-8889 7888 Faks: 03-8889 7957  
Laman web: [www.kwp.gov.my](http://www.kwp.gov.my)

---

## SIARAN MEDIA

### UNTUK LIPUTAN MEDIA MASSA

#### **JEJAK WARISAN @ PINTASAN SALOMA MENUTUP TIRAI SAMBUTAN HARI WILAYAH PERSEKUTUAN 2020**

**KUALA LUMPUR, 29 Februari 2020** – Lebih 2,500 peserta membanjiri Pintasan Saloma seawal 7 pagi untuk menyertai program Jejak Warisan @ Pintasan Saloma yang merupakan penutup tirai bagi Sambutan Hari Wilayah Persekutuan 2020. Sepanjang bulan Februari ini, Kementerian Wilayah Persekutuan (KWP) serta agensi telah menganjurkan 29 program di ketiga-tiga Wilayah Persekutuan merangkumi 5 kluster utama iaitu Kluster Pengiktirafan, Kluster Mesra Rakyat, Kluster Sukan Dan Rekreasi, Kluster Ilmiah Dan Kerohanian dan Kluster Inisiatif Mensejahterakan Rakyat. Program Jejak Warisan @ Pintasan Saloma pada hari ini adalah anjuran bersama KWP dan Perbadanan Pembangunan Kampong Bharu (PKB) di bawah kluster Sukan Dan Rekreasi.

Acara *Fun Walk* sepanjang 5 kilometer ini merupakan acara yang julung kalinya diadakan di laluan pejalan kaki Pintasan Saloma yang telah dibuka untuk kegunaan orang ramai sejak 5 Februari 2020. Selain *Fun Walk*, program ini juga turut diisi dengan aktiviti seperti Pertandingan Pakaian Busana Tradisional Melayu dan Pertandingan Mewarna untuk kanak-kanak. Program yang melibatkan penglibatan pertubuhan-pertubuhan komuniti Kampong Bharu ini turut mendapat kerjasama daripada agensi-agensi kerajaan dan NGO's.

Program ini menambahkan lagi kemeriahan sambutan Hari Wilayah Persekutuan pada tahun ini di samping dapat memperkenalkan dan mempromosikan Pintasan Saloma ini kepada orang ramai. Pada masa yang sama, program ini juga diadakan bagi memupuk semangat *self-belonging* terutamanya dalam kalangan warga kota agar mereka dapat menghargai kemudahan dan keunikan seni bina ini dengan tidak melakukan sebarang vandalisma di Pintasan Saloma. Ia sepatutnya menjadi kebanggaan dan sebagai ikon pelancongan bagi Wilayah Persekutuan Kuala Lumpur.

Pintasan Saloma yang memberi kemudahan kepada orang ramai terutamanya penduduk Kampong Bharu dalam memendekkan tempoh perjalanan di antara Kampong Bharu dengan Menara Berkembar Kuala Lumpur (KLCC) yang hanya mengambil masa 7 sehingga 10 minit perjalanan berbanding 30 minit sebelum ini. Secara tidak langsung pintasan ini juga dapat menarik lebih ramai pengunjung serta pelancong untuk ke Kampong Bharu yang merupakan “Syurga Makanan” di Wilayah Persekutuan Kuala Lumpur.

**Disediakan Oleh:  
Bahagian Komunikasi Korporat  
Kementerian Wilayah Persekutuan  
29 Februari 2020**